

27

C7832

Abt CD 84

Uc 8720

AD
Serenissimum ac Potentissimum
 POLONIÆ SUECIAEQ; REGEM
 &c. &c. &c. &c.

IOANNEM
 CASIMIRUM

Gedanum solenniter & gloriose
 intrantem

SENATUS GEDANENSIS

COMPELLATIO

juxta portam Civitatis primariam:

Ad eamq;

RESPONSIO

Illustrissimi Supremi Regni

CANCELLARII.

DIE XV. NOVEMB.

ANNO CIO IDC LVI.



TYPIS VIDUÆ GEORGII RHETII,

Imprimebat DAVID-FRIDERIGUS RHETIUS.

vlls 1197149

COMPELLATIO SENATUS

Per

Syndicum Civitatis

Vincentium Fabricium.

SERENISSIME ET POTENTISSIME REX

ET DOMINE, DOMINE ET REX NO-

STER CLEMENTISSIME,



Onstat eas gentes, quæ ad extremum Septentrionem remotæ degunt, certo anni tempore, aliquot Mensium perpetua nocte involvi; Sole, utpote scaturigine lucis & fonte, ultra Æquatorem, meridiem versus, longius recedente. Quæ tenebræ, quando, reciprocante exoptati almiq; sideris curu, dispelluntur, non tam dies & sol, quam salus atq; ipsa vita obscuris hætenus miserisq; mortalibus, summo & incredibili ipforum cum gaudio reddi videntur. Sane feliciori sub siderum positu illud late patens imperium Sarmaticum situm est, quod divinum Numen Sacræ Regiæ Majestati Vestræ Domino Nostro Clementissimo regnandum commisit, quam ut per naturæ ordinem istiusmodi infelicitati possit esse

obnoxium. Sed alias tenebras, aliam omnino noctem in Poloniae inclytum Regnum, terrasq; annexas superiori anno idem fatalis ille septentrio invexit: five potius Deus opt: max: infensus sceleribus peccatisq; populi, & iustissimam ultionem expetens, horribiles illas tempestates, profundamq; caliginem florentissimis antea provinciis superfudit. Quæ exinde consecutæ sunt calamitates & miseriæ infinitæ, eas hoc tempore recensere, id vero foret interpolare hodiernæ lucis celebritatem, gaudiumq; publicum corrumpere. & erit profecto pietati convenientius Deo nostro laudes gloriamq; tribuere de omnibus, quæcunq; à suprema ipsius iustitia, sapientia infinita, & liberrimo de rebus mortalium, pro ipsorum bono, decernendi arbitrio hætenus fuerunt, profecta. Quin immo propemodum iam necesse est luctuosa omnia dissipari, postquam lætiora exoriri tempora animadvertimus, peractis prope, uti speramus, mandatis factorum, & numine placato: in primis postquam coram conspiciamus Poloniae Prusiaeq; plusquam Septentrionalibus tenebris hætenus immerfis, redditum ac restitutum optimum piissimumq; Prin-

Principem, id est solem nostrum non tantum esse reductum, sed vero post immensos labores exhaustos, superatas difficultates & discussa pericula infinita, Regiæ fortitudinis & magnanimitatis, tum paternæ quoq; pro fidelibus subditis curæ & sollicitudinis radios, veramq; lucem longe lateq; diffundere. Ad hunc itaq; desideratissimū lætissimumq; conspectum, Serenissime Rex, Gedanenses Tui confertim provolant, & ultra, quam dici possit, exultant, omnium præteritarum miseriarum pene obliti: Cujus publicæ lætitiæ Civitatis Senatus, qui hic adstat, interpres est, eo breviori alloquio, quod ad demonstrandam & comprobendam devotissimæ subjectionis suæ fidem & sinceritatem verbis opus non esse, sed se in gratia & clementia Regis & Domini sui benignissimi tuto & secure acquiescere posse confidunt. Porro venerabundi inter Regias manus consignant portarum claves, subjectionis tesseram, non minori animorum fiducia & alacritate, quam qua ista Civitas fortunas omnes vitamq; & sanguinem suorum Regi suo Clementissimo jam pridem devovit: collocantes insuper, post Deum Optimum Maxi-

Maximum in Sacra Regia Majestate Vestrâ spem omnem et fiduciam salutis et incolumitatis suæ, et fortunas facultatesq; suas exhaustas planeq; afflictissimas à benignissimo et propitio Sole illo collustrari et refoveri desiderantes. Pro cuius spei, voti, ac desiderij feliciori augurio ad osculum Regiæ manus illius gloriosæ et victricis benigne admitti supplices expetunt.

RESPON-

RESPONSUM NOMINE
SACR. REG. MAIEST.

Per
ILLUSTRISSIMUM DOMINUM,
DN. STEPHANUM DE PILCA
KORYCZINSKI,
Supremum Regni Poloniae
CANCELLARIUM &c. &c.

Non potest non gratisimam habere Sacra Regia Majestas Dominus noster Clementissimus Spectabilitatum Vestrarum salutationem, qui singulari merito, benevolentiam & affectum Sacræ Regiæ Majestatis Domini nostri Clementissimi Vobis Urbiq; Vestræ devinxistis. Quippe cum res adversæ virtutem maxime explorent, Vobis certè excellentis virtutis, ob servatam integrè fidem, decus, & palma ista debetur, ut Viri prudentes, Principi Vestro & Reipublicæ fidi, ac salutare, Orbis judicio, perennatura etiam ad posteros fama, audiatis. Adduxerat planè in ultimum discrimen rem Polonam felix perfidia; grassabatur tumidus per Provincias Regni hostis, ac dormienti fortuna velut reti civitates & arces capiebat. Vos tamen spem meliorem semper alentes, neq; blandienti primis initiis felicitate, nec priva-

privatarum rerum detrimentis, aut ingentibus
promissis, aut ferocibus minis dimoveri officio
potuistis. Sed eximia virtute, fide, & constantia
Sacra Regiæ Maiestatis Domini Nostri Cle-
mentissimi totiusq; Reipubl: partes difficillimis
temporibus sustinuistis. Rectè itaq; æstimat Sa-
cra Regia Majestas Dominus Noster Clemen-
tissimus, quantum incrementis hostium nocue-
rit, Spectabilitates Vestras infractas stetisse.
Deus prohibuit, virtutemq; Vobis instinxit, ut
in una urbe Orbis Polonus, à vi, tyrannide, &
fraudibus teterrimi hostis servaretur. Cæte-
rum spectante Orbe universo collaudat Sacra
Regia Majestas Dominus Noster Clementissi-
mus virtutem Spectabilitatum Vestrarum, ni-
hilq; antiquius habere se pollicetur, quam ut
prudentiæ, fidei, & fortitudini Spectabilitatum
Vestrarum gratitudine Regia, & Reipublicæ o-
mni, qua par est, ratione respondeatur. Et cum
in vim debitæ Principi suo observantiæ, claves
Civitatis huius Sacra Regia Maiestati Domi-
no Nostro Clementissimo reddant, vicissim in
vim maioris confidentiæ easdem Sacra Regia
Maiestas Spectabilitatibus Vestris restituit, per-
sonam suam Regiam, ac Senatus sui, suorumq;
custodiæ vestræ committit, & in maioris testimo-
nii symbolum ad exosculandam manum Regiam
gratiosè admittit.

Hist. Polon.

b. spec.

